

# Orang Asli diseru ubah cara hidup selaras dengan pembangunan

UM = 7 SEP 1990

Oleh  
Haji Alang Ahmad

ROMPIN 6 Sept. — Perdana Menteri, Dato' Sri Dr. Mahathir Mohamad, mengingatkan masyarakat Orang Asli supaya mengubah cara hidup mereka, untuk menjadi bangsa yang maju selaras dengan pembangunan yang dinikmati oleh bangsa lain di negara ini.

Orang Asli, tegas beliau, tidak seharusnya mengamalkan sikap berpindah-pindah dari satu tempat ke satu tempat dan hidup sebagai petani, serta mencari rotan untuk nafkah hidup.

Sebaliknya, menurut Perdana Menteri, masyarakat Orang Asli, perlu mengikuti contoh bangsa lain seperti orang Melayu, Cina atau India, yang kebanyakan mereka sekarang telah meninggalkan cara hidup lama bangsa mereka, dengan menceburkan diri secara aktif di dalam bidang pemiagaan, pertanian serta perindustrian.

"Orang Asli, mesti menjadi sebahagian dari masyarakat Malaysia yang sama-sama mengambil tempat untuk maju, sebagaimana bangsa-bangsa lain," tegasnya.

Berucap kepada masyarakat Orang Asli, di Rancangan Pengumpulan Semula Kedaik, pagi ini, Dato' Sri Dr. Mahathir menyatakan, sejak merdeka hingga sekarang, masyarakat Orang Asli tidak ditinggalkan dari menikmati rojek pembangunan sama seperti bangsa lain.

Setiap tahun, katanya, kerajaan telah memperuntukkan sebanyak \$51.3 juta bagi membiayai pelbagai projek pembangunan masyarakat Orang Asli, terutama dalam membantu mempertingkatkan taraf hidup dan pelajaran.

Peruntukan itu, menurut beliau, termasuk membina 4 buah asrama pelajar anak-anak Orang Asli yang berharga \$6 juta, dan melaksanakan beberapa buah projek Rancangan Penyusunan Semula (RPS) kepada 2,034 keluarga masyarakat Orang Asli di seluruh Semenanjung.

Perdana Menteri memberi jaminan, segala projek untuk membangunkan masyarakat Orang Asli akan terus dipertingkat jika kerajaan yang ada sekarang berkuasa.

Tidak dinafikan, tegas beliau, sebahagian kecil dari masyarakat Orang Asli sekarang telah meningkat maju, dan ada di antaranya telah melanjutkan pelajaran pengajian tinggi, sama ada di dalam atau di luar negara, sehingga berjaya menjadi pegawai kanan kerajaan atau swasta dan menjadi pensyarah di universiti.

"Sebahagian pula telah menceburkan diri di dalam pasukan keselamatan seperti pasukan Polis hutan, serta menjadi anggota tentera yang mana keberanian serta kegigihan mereka menjalankan tugas mengamankan negara dari ancaman musuh, telah terbukti," katanya.

"Jasa serta tanggungjawab masyarakat Orang Asli yang sanggup menjadi mata dan telinga kerajaan, semasa menentang ancaman komunis di masa lalu, tidak pernah dilupakan oleh kerajaan," ujar beliau.

Beliau menyifatkan nasib Orang Asli di negara ini, lebih baik serta beruntung dibandingkan dengan nasib yang dialami oleh Orang-Orang Asli di negara-negara lain:

Katanya, bagi setengah-setengah negara yang mengaku dirinya sebagai negara maju, tidak memperdulikan nasib Orang Asli negara mereka dan menganggap Orang Asli sebagai penghalang pembangunan.